



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIÁL

## ***Komunikadu Imprensa***

22 Maiu 2013

### **Implementasaun Rekomendasaun KVA hanesan Obrigasaun Estadu Timor Leste no Indonézia**

Iha Tersa-feira, 21 Maiu 2013, Ekipa JSMP (*Judicial System Monitoring Programa*) hasoru malu ho Diretór Jerál ba Asuntu Bilateral, Ministériu Negósiu Estranjeiru (MNE) Sr. Marcos da Costa, iha edifísiu MNE, Avenida Praia dos Coqueiros, Dili, Timor-Leste.

Objetivu prinsipál husi audiénsia ne'e mak atu husu tuir kona-ba kompromisu no esforsu Estadu Timor-Leste nian, liuhosi MNE-Divizaun Bilateral iha implementasaun rekomendasaun Komisaun Verdade no Amizade (KVA), liu-liu ba asuntu ema lakon no ajenda foun kona-ba planu enkontru altu nivel-*Senior Official Meeting* (SOM) entre Governu Timor-Leste no Indonéziu tuir mai.

*“JSMP apresia tebes disponibilidade MNE-Divizaun Bilateral nian hodi halo enkontru no fahe informasaun kona-ba kompromisu no esforsu Governu Timor-Leste nian hodi implementa rekomendasaun sira KVA nian, liu-liu asuntu ema lakon, tanbá ida ne'e hanesan obrigasaun Estadu Timor Leste no Indonézia nian”*, dehan Luis de Oliveira Sampaio, Diretór Ezekutivu JSMP.

Relasiona ho kestaun ne'e, Diretór Jerál ba Asuntu Bilateral no Diplomasia informa katak iha prinsipiu Governu Timor Leste iha vontade di'ak atu haree ba asuntu ne'e, tanba ne'e partensia interese Timor-Leste nian. Durente ne'e Governu Timor-Leste seidauk hasoru dezafiu boot iha parte diplomasia nian.

Antes ne'e, iha Abril 2013, representante sira Estadu Timor Leste no Indonézia nian halo enkontru ida iha Bali-Indonézia hodi diskute kona-ba kria *Task force* ida ne'ebé sei defini Termu Referensia (ToR) ba harii Komisaun Konjuta ida ne'ebé sei responsabiliza ba implementasaun rekomendasaun KVA nian, liu-liu kona-ba ema lakon.

Governu Timor-Leste haruka ona *“non paper”* ida ba Governu Indonézia kona-ba eskopu (âmbitu/*ruang lingkup*) asuntu ema lakon nian ne'ebé inklui timoroan sira ne'ebé lakon durante okupasaun Indonézia nian. Indonézia ninia *“non paper”* ne'ebé haruka mai Governu Timor-Leste limita ona eskopu asuntu ema lakon ba kazu 1999 de'it, la inklui kazu sira ne'ebé akontese antes períodu ida ne'e. Maske nune'e, Governu Timor-Leste konsidera momentum ne'e nu'udar oportunidade ida ne'ebé Timor-Leste bele esplora. Maibé la taka dalan ba kompromisu no esforsu Estadu Timor-Leste nian hodi buka tuir timoroan sira hotu ne'ebé lakon durante tinan 24 okupasaun Indonézia nian.

Diretór ne'e apresia tebes servisu sosiedade sivíl sira nian no konsidera nu'udar parseiru importante ida ba asuntu direitu umanu no justisa. Liu tan nia informa katak tuir planu Indonézia no Timor Leste sei halo fali enkontru Oficial Nivel Altu-*Senior Official Meeting* (SOM) iha Timor Leste iha

2014 atu hare fali buat sira ne'ebé diskuti ona inkui atu estabele Komisaun Konjunta ne'ebé sei haree ba prosesu implementasaun rekomendasaun KVA.

Atu hetan informasaun kompleitu bele kontaktu direitamente:

Luis de Oliveira Sampaio

Diretór ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Telefone: 3323883

[www.jsmp.tl](http://www.jsmp.tl)

<http://www.facebook.com/timorleste.jsmp>